

lis Gnovis

■ **DAVIAN.** Memorie di Hiroshima e di Nagasaki

I operadôrs di pàs dal Friûl ch'a lotin pal disarmament nucleâr, la di dal inovâl dal bombardament atomic di Nagasaki, martars ai 9 di Avost, a tornin a dâsi dongje devant de «Base Usaf» di Davian par une manifestazion pacifiche cuntri de menace nucleâr. La convigne e tacarà a 10, curade di «Beati i costruttori di pace» (Pordenon e Italie), dal Centri pal biel acet «E. Balducci» (Çuan), di «Pax Christi» (Gurize e Italie), de Comunitât «San Martino al Campo» (Triest), de Cjase pal biel acet «Oasi 2» (Cordenons), de «Rete Dasi Fvg», di «Anpi» (Pordenon), di «Donne in nero» (Udin) e di «Archi» (Montreâl). Di chê strade, al sarà memoreât pre' Pierluigi Di Piazza, ch'al à simpri animât l'apontament di Davian, spartint lis «sôs peraulis iluminadis e ispiradis» e il «so pinsir profetic e atuâl».

■ **SAN VÏT DAL TILIMENT.** Autisim cence confins

Ai 22 di Avost, Valentino Gregoris al torne a partî. E tache l'edizion 2022 dal Proget «Autismo Percorso di vita», ch'è puartarà di San Vît dal Tiliment a Strasburc, li dal Parlament europeu, il puartevôs de clape pordenonese «Noi Uniti per l'Autismo», cuntun percors cun 23 stanzis e 684,8 chilometris, a pît. Di strade, Gregoris, ch'al è pari di un frut cul autisim, al scontrarà lis fameis plui isoladis, al stiçarà lis aministracions publichis, si messedarà cu lis clapis di volontariât par inviâ un confront e par implantâ «una rete di conoscenze reciproche atte ad ottimizzare la presa in carico globale dei soggetti autistici e delle loro famiglie secondo le linee guida scientifiche internazionali», cemût ch'al à motivât il president di «Noi Uniti per l'Autismo», Luca Apollonio, te presentazion dal proget. Il «Percors di vite» di chest an al finissarà a Strasburc, ai 12 di Setembar.

■ **TRAMONÇ DISOT.** Conservazion ative dal patrimoni

Te suaze de «Strategie complessive di gestione», ch'al è l'imprest che la Rêt dal patrimoni dal paisaç e des areis protezudis de Fondazione «Dolomiti Unesco» e dopre par promovi e par slargjâ lis colaborazions fra istituzions e ents teritoriâi dentri e fûr de region dolomitane pupilade, al ven publicât il «Catalogo delle buone pratiche di conservazione attiva». L'edizion di chest an e propon un scjap d'iniziativis svilupadis te purizion furlane des Dolomitis. Fra i progetts dal «Parc naturâl Dolomitis furlanis», a son stâts notâts il «Piano di interventi sulla sentieristica» e lis propuestis educativis «A scuola nel Parco» e «Esperienza in casera». Te sezion ch'è propon praticis positivis fûr dai confins des areis protezudis, a son presentâts l'«Albergo diffuso Valcellina e Val Vajont», lis ativitâts dal «Consorzio delle Valli e delle Dolomiti friulane» e il proget dal Ecomuseu des aghis dal Glemonat «Adotta una mucca». La publicazion e pues jessi scrutinade su la rêt des rêts, a la direzion: www.dolomitiunesco.info/wp-content/uploads/2022/07/catalogo-buone-pratiche.pdf.

Miercus 3 Scuvierte relicuiis S. Stiefin

Joibe 4 S. Zuan Marie Vianney

Vinars 5 S. Svualt Re martar

Sabide 6 Trasfigurazion dal Signôr

Domenie 7 XIX Domenie vie pal an

Lunis 8 S. Domeni di Guzmàn

Martars 9 S. Taresie

Il timp Ancjemò cjalt.



Il soreli
Ai 3 al jeve aes 5.51
e al va a mont aes 20.34.



La lune
Ai 5 Prin cuart.

Il proverbi
Zoventût aur batût.
Lis voris dal mès
Si semenin indivie, rucule, spinaze, ardielut.
Si traplantin capûs, lidrics, caulis e brocui
pal Invier.

Nudrî lidrîs mondiâls

Vincj agns cul proget pe Diaspore «Studiare in Friuli»

grancj valôrs educatîfs e culturâi, puartâts indevant di 20 agns incà dal proget par students de Diaspore «Studiare in Friuli», a son stâts marcâts li dal Senât de Republiche di Argentine, dulà che il Convit «Paolo Diacono» di Cividât al à stât ricevût in forme uficiâl, ai 12 di Lui, in grazie dal senatôr di divignin-ce furlane Dionisio Scarpin de Region di Santa Fe.

La delegazion, impegnade intun viaç che vie pal mès di Lui i à permetût di visitâ cetantis Comunitâts argentinis e brasilianis, e jere componude de retore dal Convit cividalin, Alberta Petoello, dal responsabil dal Proget internazional, Giancarlo Scoyni, e dal educadôr Giorgio Cromaz, che dal an scolastic gnûf i darà la volte a Scoyni. Di cuant che «Studiare in Friuli» al à stât creât, in grazie de colaborazion cul Ent «Friuli nel Mondo» e cu la rêt mondial dai «Fogolârs furlans», a son rivâts in Furlanie passe 400 zovins de Diaspore, natîfs di Argentine, Australie, Belgjiche, Brasil, Canadâ, Cravua-zie, Ecuador, Gjermanie, Mexico, Olande, Panamá, Perù, Rumenie, Uruguay e Venezuela, ch'a àn podût frequentâ par un an intîr lis scuclis superiôrs dal Convit o altris istitûts de provincie di Udin.

«O sin persuadûts dal grant valôr formatif che chest proget di scambi scolastic al ufrîs, inricjint il patrimoni culturâl dai nestrîs zovins, intun'oti-



La delegazion di «Studiare in Friuli» in visite li dal Senât argentin

in Argentine e Brasil, infuartide la vocazion internazional dal Convit di Cividât

che di apartignince civiche ch'è met adun formazion intercultural e identitâts locals», ur à ripetût la retore Petoello a ducj i siei interlocutôrs sudamericani.

«Il nestrî proget – e à ancje dit la dirigente scolastiche – al favoris une formazion dreçada a l'internazionalitât, a l'interculturalitât e a la cognosince des lenghis, tant chês locals che chês comunitariis. Cun di plui, al zove une vore par tignî cjalts i rapuarts des Comunitâts furlanis tal forest cu la Patrie dai vons».

La delegazion dal Convit «Paolo Diacono», intant des visitis in Avellaneda di Santa Fe, a Buenos Aires, a Cordoba e tal Rio Grande do Sul, e à podût profundî i leams e lis colaborazions cui Fogolârs argentinis da la

capitâl, di Cordoba, di Colonia Caroya, di Sunchales, di Avellaneda e cun chei brasilians di Espirito Santo e di Santa Maria.

A son stadis organizadis ancje riunionis cun diviersis «Municipalidades» argentinis. Une convigne speciâl e je stade fate li dal Ministeri da l'Educazion de Provincie di Cordoba cul intindiment di rinovâ la cooperazion stabilide dal acuardi firmât dal retôr dal Convit d'in chêt volte, Oldino Cernoia, dal 2008.

Chest an scolastic cu ven, a rivaran a Cividât i students fra i 15 e i 17 agns ch'a àn presentât la sô candidature dentri dai 20 di Avrîl. Il proget «Studiare in Friuli» al è prudelat de «Fondazione Friuli», de Region, di «Civibank» e dal Cumon di Cividât, ch'a ufrissin lis borsis di studi necessariis. In plui dal percors scolastic (curât tal respîet des regulis su la mobilitât internazional dai students), ai ospits ur vignarà ufierte la pussibilitât di cjapâ part a ocasionis di visite e di confront cu la realtât regional e cu lis vilis d'indulâ ch'a son partîts par emigrâ i siei vons.

Mario Zili

Gurize. In visite a la glesie dal Spirtu Sant

Graciant la colaborazion fra la Glesie gurizane dai Sants Elar e Tazian e l'«Erpac» (ch'al è l'ent regional pe gestione dal patrimoni culturâl), la gleseute dal Spirtu Sant, daprûf dal cjistiel, e tornarà a restâ vierte vie pal di. La convenzion, firmade dal plevan pre' Nicola Ban e de direttore di «Erpac» Anna Del Bianco, e permetarà di garantî la preiere e lis visitis seont i oraris dai Museus provinciâi di Gurize (9-19), cun personâl regional. La glesie d'implant gotic e fo tirade sù fra il 1398 e il 1414, par volontât dai fradris Michele e Giovanni Rabatta.

Tradizions furlanis dal mès

par cure di Mario Martinis

I PROVERBIS DAL MÈS DI AVOST

Otâf mès dal an e cûr dal Istât, sede dal ream dal soreli tal segn zodiacâl dal Leon, Avost al è il mès de polse total des fadiis des voris agrariis e cumò ancje di dutis lis ativitâts produtivis che tal timp cetant cjalt de canicule a vegnin fermadis e a permetin a ducj un periodi di soste. Intant che lis pomis a van indevant a madurî sot dal solion, lis localitâts turisticis di mont e di mâr a registrin il dut esaurî. Ma in Avost, il lunc timp dal cjalt si interomp: a rivin i prins temporai e lis perturbazions atmosferichis che tornin a puartâ il fresc e il cambiament des usancis dai animâi, primis jenfri ducj lis sisilis che tor la fin dal mès a bandonin in maniere definitive lis tieris temperadis par lâ viers l'Afriche. A segnâ i scjalins dal declin de Astât, tal calendari populâr dal mès di Avost a son lis fiestis di S. Laurinç (10-VIII), de Assunzion de Beade Vergine Marie (15-VIII), di S. Roc (16-VIII) e di S. Bartolomiu (24-VIII) e la fiestone de Cuarte Domenie di Avost.



Ve ca i proverbis di Avost:

- La prime ploie di avost e rinfrescje il bosc
- Se al plûf di avost, al plûf gran e most
- In avost tante rosade e une vore di biel timp
- Soreli in avost ti cuei in rost
- Di avost ognidun al mangje a so cost
- Cuant che al ven avost prepare i bari pal gnûf most
- Se al plûf a Sant Laurinç (10-VIII), al plûf cul cuinç
- Se al plûf a Sant Lurinc, la campagne la vinc
- A Sant Lurinc lis nolis sot i dincj
- Ae Madone di avost (15-VIII) angurie e poleçs arost
- La ploie pe Madone e je buine se nol tone
- Dio nus vuardi dal sut, ma tra lis Madonis piês di dut/ Sant Roc (16-VIII), la panole pal poc
- Sant Roc al dâ la clâf a ogni pitoc e a S. Simon (28-X) le torne al paron
- A Sant Bartolomio (24-VIII) la cisile a va cun Diu
- Come che al è il timp a Sant Bartolomio, al sarà di vendemis.